

四庫全書

集部

欽定四庫全書

集部

松桂堂全集

目錄  
卷一

詳校官庶吉士

臣汪彥博

助教

臣

常循覆勘

總校官知縣

臣楊懋珩

校對官助教

臣李學錦

謄錄監生

臣鍾忠

松桂堂全集原序

康熙己未

詔舉博學鴻詞是時

國家治化翔洽文教覃敷海宇人文彬彬日盛老宿名士雲集

輦轂月給司農錢以膳凡試入高等者授為翰林及期御試體仁閣下西清給札光祿傳餐

恩遇隆渥實唐宋制科所未有也於是海鹽羨門彭先

生裛然首舉

命下之日自王公九列及庠序諸生思先睹試帖以為  
快流播鈔謄長安為之紙貴

聖祖仁皇帝孝養

重聞豫順之氣洋溢海內兵革既休獄訟衰息

勅詞臣釐定樂章象功昭德先生夙有撰著繕錄進

呈屢邀

獎賞嗣是眷注日隆洊歷少宰又數年移疾歸里時陳

羣方髻齟粗解四聲隨先王父詣先生因得親先生議  
論風旨請學為詩則曰讀萬卷書行萬里路下筆便有  
奇氣蓋先生自道閱歷也與先生同舉諸公其年陳君  
有檢討集次耕潘君有遂初堂集大可毛君有西河全  
集鈍翁汪君有堯峯集悔菴尤君有西堂全集竹垞先  
生有曝書亭集他如施愚山龐雪厓王華亭湯睢州諸  
君子以專集行世者無慮數十家亦既飈馳天下幾幾  
乎人懷盈尺矣獨先生手訂松桂堂全集授令子承祚

承祚胚胎前徽能讀父書思鋟木以垂久遠居無何家  
日益貧方拾橡糗松以自給厥後出宰三晉擬儲俸錢  
謀付剗剗忽邁師門波累流離瑣尾幾瀕於危承祚處  
之夷然去官日家事一切不問獨抱遺集詣京師已而  
事白擢任別駕屢有遷轉皆在畿輔所至以清白稱陳  
羣與承祚本中表兄弟生同里長同仕又先後同事畿  
輔者六年承祚刺先生遺集既竣索陳羣弁言昔東坡  
生平以不得見范文正公為憾及與其季子德孺同僚

因序其集況陳羣得見先生於里第請業請益在少時  
已切嚮往者乎先生學問該洽於書無不讀所著詩賦  
莊雅典麗又復春容流宕而於館閣諸體尤為瓌瑋絕  
特一時奉為主臬在唐則如張燕公蘓許公在宋則如  
晏元獻周必大樓攻媿諸公先生沒後垂五十年而是  
集始出嚮使承祚於顛狽中稍弛寶護則吉光懸黎方  
湮沒於荒煙白草世又烏睹所為珍貴者耶新城王尚  
書於有明諸詩人獨愛徐昌穀高蘇門二家曾為評次

手定而傳之後之君子讀先生之集者或亦有斯趣焉  
乾隆八年五月既望同里後學錢陳羣拜撰



欽定四庫全書

集部七

松桂堂全集目錄

別集類六

國朝

卷一

賦

樂章

古今詩

卷二

古今詩

卷三

古今詩

卷四

古今詩

卷五

古今詩

卷六

古今詩

卷七

古今詩

卷八

古今詩

卷九

古今詩

卷十

古今詩

卷十一

古今詩

卷十二

古今詩

卷十三

古今詩

卷十四

古今詩

卷十五

古今詩

卷十六

古今詩

卷十七

古今詩

卷十八

古今詩

卷十九

古今詩

卷二十

古今詩

卷二十一

古今詩

卷二十二

古今詩

卷二十三

古今詩

卷二十四

古今詩

卷二十五

古今詩

卷二十六

古今詩

卷二十七

古今詩

卷二十八

古今詩

卷二十九

古今詩

卷三十

古今詩



卷三十一

古今詩

卷三十二

古今詩

卷三十三

古今詩

卷三十四

古今詩

卷三十五

表

奏

頌

卷三十六

頌

卷三十七

序

卷三十八

延露詞一

卷三十九

延露詞二

卷四十

延露詞三

卷四十一

南淮集一

卷四十二

南淮集二

卷四十三

南淮集三

臣等謹案松桂堂全集三十七卷延露詞三  
卷南淮集三卷

國朝彭孫通撰孫通字駿孫海鹽人順治己亥  
進士官內閣中書康熙己未舉博學鴻詞

召試擢第一改編修歷官吏部侍郎兼翰林學士所  
著南淮集香奩唱和集金粟詞延露詞俱先  
有刻本是編乃乾隆癸亥其子景曾所刊前  
有錢陳羣序稱與孫適同舉者如陳維崧潘  
耒毛奇齡汪琬朱彝尊尤侗龐塏王頊齡湯  
斌均各有專集行世惟孫適手訂松桂堂集  
閱五十年未刊至景曾始得授梓又稱其館  
閣諸體尤為瓌瑋絕特蓋孫適博雅之才際

欽定四庫全書

目錄

國家文治鼎新和聲以鳴太平之盛要亦無愧  
於詞科矣其延露詞與南淮集舊有刊本別  
行此本又載之則景曾並附於後以為全集  
云乾隆四十五年六月恭校上

總纂官

臣紀昀  
臣陸錫熊  
臣孫士毅

總校官

臣陸

費墀

欽定四庫全書

松桂堂全集卷一

吏部侍郎彭孫通撰

璿璣玉衡賦

并序

臣聞善言天者必有驗於人善言人者必有合於

天良以景曜宣明聿著清寧之烈泰符炳煜式昭  
貞觀之風乃上聖之休徵為至誠之嘉命然其理  
存幽蹟數極深微自非假象以推占詎易求端於

高遠儀器之陳其來舊矣蓋古之言天者類有六  
家宣夜之術既失真傳周髀之書殊多舛謬姚信  
昕天之說畧而未詳虞嘉安天之編疎而難核以  
及穹天之論尤為荒遠之談折衷五者之中斷以  
渾天為允故觀象之器至後世而彌精齊政之方  
自中天而已備夫以欽明之代濬哲之朝蓂莢紀  
辰復何勞於銀箭鳳凰司正亦無假於靈臺而賓  
日東嵎餞陽西谷黃鍾應律即稽金虎之祥清徵



鳴笳還候蒼龍之宿立璿璣玉衡之製命羲和仲  
叔之官豈非敬天勤民之至撫辰熙績之大者乎  
我

皇上昭受在躬靈承加祐五星會於營室六術起於甲  
寅猶乃儲思穆清宅心淵謐法唐堯之欽若勅虞  
舜之時幾爰詔微臣作為是賦敢攄牖見以當管  
窺

若夫鴻濛肇闢象緯昭垂兩儀定位七曜同規循蜚疏

仡之代觀雲紀鳥之師靡不懿文洽禮班法樹司辨物  
土於九域考星躔於四維然而制器尚象效崇法卑首  
重天事以授民時占斗綱以辨氣渾神策以迎曦有隸  
首之綜算有容成之測儀始甲子於大撓繼平秩於重  
黎立璿璣以仰則發玉衡而上窺垂古今之彝憲表貞  
恒之範圍於是祕器初呈疇人攸屬體本彈丸形惟轉  
轂飾以文珠筦之橫玉珠四綴而長明玉在簫而旁燭  
內藏之以奧扃外運之以員軸任激水之推移抱運環

之迴復澄天鏡於雲間絡地維於鰲足寓機緘之至精  
亮幽遐之可暴斂八柱於寸眸收七衡於一矚爾其積  
氣高浮清陽上薦廓爾無名渾然難見不推靈曜之符  
詎識乾行之健日往而月來星迴而斗建晃菱彩之朝  
飛皎桂輪之夕展耿木德之東輝睨離情之南燦金水  
則附日而旋填星則居中而轉道別疾徐度分近遠交  
會於辰歸餘以羨或主客之異形或宿羸之殊驗并陳  
寶籥之中俱入靈臺之撰乃觀懸象乃揆星精東西森

列黃赤交繫晷齊景正極準端平察次舍運行之部頒  
作譌成易之經按分至啟閉之節析晦明寒暑之程候  
咸池之綺旭迓金樞之素靈窺隱現於列宿酌盈虛於  
五行其攝乎坤軸也十有九萬三千里而廣其括乎乾  
象也三百六十有五度而贏其紀乎日月也九道四遊  
而其行可迹其統乎星辰也三百二十而其官可名既  
宿離之不忒亦推步之有恒倬天章而文煥布軌道而  
衢亨窮精研於綿邈通幽贊於神明審聖人之制作迺

度越於恒情彼夫協律紀祥司天辨叙七政有占三儀  
迭舉壽昌勅智於良型平子覃精於渺緒并攄窺管之  
懷寧止挈瓶之數雖貽則於來今實晞風於曩古曠百  
世而同符端有候於

聖主

皇帝握璇極之天珍凝泰符之典瑞萃筭畢而類精薦  
圭璋而通氣好以月從敬因日致仁育義裁禮和智睿  
法令信於陰陽圖書炳於經緯五德用徵三光合契振

采揚黼連珠編貝猶復旦明乾惕陟降非遙夙夜昭事  
鑒觀不忮單心於宥密升貺於穹霄故乃神符翕葩景  
祉宣昭碩麟獲於靈囿慶雲蔭於南郊絳河明而如鏡  
甘露渥而如膏吐榮光以無際叶瓊琯以長調流永年  
之懿軌建奕襮之芳標啟斯儀以遙度如寶歷之承堯  
末臣幸逢乎嘉運恍廁身於瞻雲就日星陳旦復之朝

白鸚鵡賦

惟

皇朝之受命拱寶錄而凝正招女牀而鸞集巢阿閣而  
鳳鳴雀啣書而入戶鵲聞樂而翔庭雖異物之非寶實  
嘉祥之有徵

聖心推而勿有瑞應顯而自臻矧夫殊域懷仁遐方慕  
義貢賁獻琛臣人享贄九譯以通萬里自致來曠世之  
靈禽登軼倫之珍毳蔚上國之羽儀煥中天之符瑞非  
邀福於乾靈豈格遐於神契相彼鸚鵡產自山林往來  
叢薄栖峙高深賦翩翩之微體稟聰明之慧心資善警

而通解性能言而審音縱不離於飛鳥固迥異於凡禽  
至其含靈毓異拔萃挺奇金精叶兌火德乘離丹味煥  
發紺趾紛披練裳容裔縞袂參差亭亭素質皎皎清姿  
餐唯玉粒翔必琳枝朝褰芳於懸圃夕引吭於瑤池爾  
其山海窮荒區禺遼絕林菁幽遐岩阿嵒嶮巧舌如簧  
毳衣如雪顧影流妍徘徊自悅離塵氛而獨立天既假  
其羽毛凌顥氣而孤騫人誰信其高潔乃有羅氏張襦  
虞人播弋置以雕籠假之文飾憑玉柱以無塵弄銀條



而一色雖難遂其幽棲幸未虧夫昭質辭僻陋之山陬  
遠翱翔於京國遂乃觀光曜儀遷喬去卑栖禁園之瓊  
樹侍

君王之玉墀嘯侶則白鵬妬影命儔則皓鶴增輝瑤堦  
月豔珠綴霜飛素娥韜彩青女斂霏長流連於

宸盼永供奉於仙闈亮隴坻之罕邁洵羽族之殊希若  
乃太液閎深上林邃宵物競呈祥天寧愛寶白麟獲於  
郊園皓鹿遊於池沼不黔自黑鶴鶴者三趾而紛來莫

赤匪狐濯濯者九尾而相擾皆鱗萃而星駢亦雲臻而霧繞繫斯禽之入貢同效瑞於

聖皇詎無因而自集知有感而必彰按緯文之曩迹合圖謀於前王隆大孝於尊養浹至仁於八荒故淳耀之符上格於顓穹之靈貺而精瑩之氣下通於物類之微茫於是璣明衡正乾寧坤定一畫啟羲九苞儀舜游至天休彌申景命非徒耳目之娛何止一人之慶詔九州而通節逝矣越裳之輦臨七萃而觀兵陋彼穆天之駿

天駟賦

於鑠

皇家憲天作則景曜宣昭休光翔溢獲碩麟於南郊貢  
白澤於西域育萬物而効靈總八埏而稟式器車在御  
而結旌澤馬充庭而伏軾攬符瑞之自天卜榮懷之在  
國是以乾畜孕精房星降正功先於地用健叶於天行  
資風雲之駕馭壯警蹕之登閤承靈貺於太乙騁王路  
於由庚觀其星緯獻祥河祇耀德校人是司圉師是職

冬獻夏頒執駒攻特為龍為駉齊足齊力十有二閑各  
分種色或皎皎兮虹攄或爛爛兮霞綯或鐵驪兮深黝  
或蒼騏兮翠蒨或一舉兮騰黃或將飛兮紫燕或蹀躞  
兮籥闔闔之雲或縹緲兮曳吳門之練當夫錦障乍解  
金鞭未揮鸞停層漢鵠時仙闥翩驚鴻之始集矯靈虬  
之欲飛及夫寶埒初開長楸並進五組雲影兩駉風迅  
絕瓊海於須臾登玉山於俄瞬況其骨應經文形符圖  
牒力既足稱德尤殊別去似遊龍迴於縈雪疾不奔踈

緩無銜櫪行有磬控之安步中錫鸞之節蓄雄姿於婉  
心寓馴良於英決彼夫穆駿踰輪宛駒汗血駉牝興咏  
於詩人駟牧登歌於往哲固未足以踰此威神又何容  
以較其優劣爾乃霜清紫塞氣肅金天駕言出狩肆彼  
師田屬車在後

鑾輿在前千羣霧列萬騎星駢於時禮用三驅材呈六  
種逸足爭長奇毛矜寵珠勒無聲纖塵不動攢綺谷而  
花明開幔城而霞擁披琴離之繡文列繽紛之錦幪追

義馭於炎洲驂箕風於仙隴展

帝容則歆玉歆沙昭

王度則受球受共

宸情有懌我武維揚儀成吉日旆返長楊慮東野之盡  
力念北土之留良雖吉光駉褭之名咸上登於天廐而  
驪黃牝牡之品或未盡夫遐荒豈無權奇俶黨超越騰  
驤駕短轅於虞阪服鹽車於太行局促絆羈之下悲鳴  
棧豆之傍徒擅能於千里奚受知於九方於是廣索沙

邱旁搜幽碣命造父以程材詔涓人而市骨將見恒冀  
山陞渥洼水涯蘭筋挺異驥子呈奇雲螭月駟虎氣龍  
姿備六駟之翊衛竦九陞之威儀倘見賞其神駿長託  
乘於軒墀

瀛臺賦

有序

瀛臺在

大內之右西苑之中巨構弘開規撫太紫嘉名肇錫  
髣髴蓬瀛維

世祖章皇帝闢九仞之基惜十家之產程材庀宇就下  
因高木不雕鏤飾無藻績雖茅茨儉樸不資人力  
之勞而山水縈環未減天工之勝萬幾清暇

翠輦時臨聽政勤民於是乎在我

皇上凝圖有永繼序無方粵歲斯丁諏辰重午泛舟仙  
沼弭節靈臺拂雲罕之琴離皆成湛露振芳蕤之  
的礫盡是天葩爰稽周令之文寔在南訛之月可  
以升山陵遠眺望禮之宜也時為大矣夫探奇策



府非無羣玉之峰選勝唐中亦有三神之境盤遊  
徒侈化理何裨豈若今茲有逾曩烈用竭管蠡之  
見敬陳頌述之情是愧蕪詞無當勝槩

皇清之握象闡珍錫圖凝厯苞六合以為家總八紘而  
作極貞符曜明泰階寧謐天室威神宸居淵嶷歲當疆  
圉之期月中蕤賓之律乘輿夙駕瀛臺是即位臨西兌  
而

聖澤彌宏義取東瀛而真人攸宅蓋自玉泉之水太液

之池滙為廣澤散作文漪泓碧千頃莽蒼四垂日月吐  
納軒楹蔽虧雕梁界道錦甃交陂鳳標翥羽鯨石翔鱗  
控玉竦以噴雨跨金鰲而簾雲霞波如綺蘋吹無塵景  
山之巖岫巖從瓊華之洞壑玲瓏磴道窈折澗戶幽通  
屏障羅列環玦瑋璚峰迎仙仗谷應曉鐘欲霽而林暉  
千狀具雨則嵐霏萬重乃有丹梯盤互曲廊懸度隰衍  
原平隄迴川注激水鳴春藏舟紆浦葆翠霜濃麥黃雲  
聚粧臺則琳碧為缸蕉園則春浮名樹旃檀之馥迎風

迷迭之煙成霧於是林巒迤邐川陸縱橫陟樂成之舊  
宇徑涵碧之虛亭纓岡帶阜繚白縈青樓觀崑崙殿閣  
崢嶸璇題壁碣繡供雕甍苕苕迴出翼翼孤擎跂飛鳥  
以斯厲佩長虹而若紫軼雲雨以下度排星河而上征  
可以仰餐顥氣俯揖羣靈擢樓松之千仞抗閭風之九  
成重以新萸璀璨芳幹紛蕤芝房三秀蘭畹九滋梧則  
萋葦生岡竹則檀欒映池桃李則不言成蔭枯柏則後  
凋挺姿般般之足翾翾之儀楸馴白澤圓擾黃支鳧雁

翱翔於脩渚孔翠翻騰於茂枝既乃品彙恬熙景物明  
淑睇萬里於纖毫攬九州而盈掬紫塞斜縈紅螺森矗  
聚燕風恬涼鷹霜肅隱現桑乾之河縹緲香山之麓金  
臺有駿骨之羣泰時見神光之燭升高望遠四維一矚  
柏梁無以絜其觀神明不能方其躅狹制度於通天之  
稱埒壯麗於凌雲之築

皇帝迺駕赤駟之駱樹朱鳥之旂祝融引節清徵鳴韶  
定晏陰以靜事散炎景而居高寄遠心於濠濮託逸想

於松喬於時清暉擁榭翠漲平川龍髻齊奮鳳喙爭騫  
凌雕文之畫舸曳湘縠之輕煙荷碧筒以猗靡榴絳實  
以鮮妍葵叢生而就日蒲九節而延年

宸遊既豫

睿藻仍宣灑翔鸞之仙翰染濯錦之瑤箋不數具茨之  
駕遑羨橫汾之篇若乃菡萏紛披綺粧明靚曾

詔廷臣共承休問命桂楫以溯新波見蓀橈之擊明鏡  
頌蓬池之銀鱸泛鶴觴之珠醞朱陵之李澄鮮玉井之

冰清潤甘雨滌煩涼飈解愠披九天之濺澤賡五弦之  
雅韻又若麗旭始升惠風初扇時鳥嚶鳴繁英蔥蒨黛  
耜並陳紺轅將勸辨雲物於嘉辰播雨膏於芳甸暮春  
合射之儀元已流觴之宴殿中揚白獸之樽水面捧金  
人之劒逮夫清商乍奏爽宇方澄柳寒月皎桐疎露清  
挹仙莖之沆瀣聽天籟之箏笙省斂則弄田秔熟招隱  
則小山桂馨豈獨階堆連璐徑糝雕英歌黃竹而恤祈  
寒之困詠來思而軫遠戍之情是以抱獨一堂遊神八

荒靡遠勿屈何施不臧吹動植之機以廣仁慈之汜獲  
悟流峙之理以侔道德之精剛既書同而軌一亦化美  
而治光罷烽堠於寰海受其球之駿龐攄卿雲而復旦  
呈含譽以垂芒遂乃彌性游翺從容詠陶學山探奧筆  
海迴濤緝熙懋建俊又勤招履高思下居逸念勞岐陽  
鐘鼓之盛卷阿車馬之饒登斯臺以同樂抗往哲而為  
昭小臣作頌用補風謠頌曰天垂星象地敞皇州崇臺  
沙立負乎建旂餐華日近吸英靈浮匪風則御亦雲與

遊同規方丈比美瀛洲六龍莅止視遠聽周

聖心孔懌庶政載修維德峻極上與天侔百常允陟景  
福來酬瑞繁山委嘏集川流穆然並峙萬禩千秋

溫泉賦

若夫乾維上運坤絡旁宣結為五嶽散作百川洛符禹  
範河瑞羲年靈長之美坎德斯全元氣盎溢溫泉出焉  
爾其山嶺岑崑岡巒層複衍脈高原發源峻谷瑤竇濺  
珠瓊沙噴玉初似遊絲漸如飄縠乍灑洄於谿澗終澶



漫於陵陸既漚之而淵渟亦揚之而波屬遂噴薄於郊  
垌且蔽虧於林木彼其因寒為性就下而趨凡水皆一  
茲泉則殊苞五行而迴幹乘一氣而盤紆通機緘於化  
軸開橐籥於靈樞含火德之溫煦納沃焦之委輸歷四  
時而皆煖經三冬而不渝審陰陽之為炭知天地之為  
鑪攬之融洩挹之靜深夏無毒熱冬無沍陰飛霞不積  
繁霜詎侵何俟凌人之政無勞泰谷之音蟠燭龍於水  
底媚陽燧於波心浸咸池之若木浴蹕羽之陽禽澄之

自定清之彌淨鋪縞練之纈文瑩玻璃之明鏡溯陽谷  
而可通登炎洲而若近潤能及物非由挹注之勞熱不  
因人詎改清冷之性况乃無終舊封北平勝槩明月之  
峽黃花之塞控盧龍而作咽喉翼神京而為襟帶拱北  
極而非遙瞻

孝陵而斯在王氣如龍祥雲如盖丹砂的礫而中藏醴  
泉絡繹而紛會信天產之靈區呈

皇朝之上瑞至若焦溪見於酈經驪山表於唐世蜀都

之井沈熒曲阿之潭揚沸詎有得於冲和徒相誇其神  
異豈若斯泉鬱為奧府磅礴太和綢繆終古如湛露之  
斯濃類薰風之自鼓凝之則如醴如膏洩之則為雲為  
雨可以滌煩釋躁悅志怡神寧人便體浴德澡身蕃滋  
卉物粒我生民念庶徵之時燠躋一世於陽春歲天波  
而勿幕廣

聖澤於無垠近日月而不冰非如澗水現榮光而有耀  
長似河津

天象賦

若夫太極既形兩儀並建天始地生乾清坤宴相彼皇  
穹溥博周徧彤則彈丸德惟行健理幽渺而難窺象昭  
明而可見於是曠觀峻極周覽太虛紫微之內上帝攸  
居環列宿之煥若握中樞而謚如擁槍梃而莖擢啟闔  
闔而雲攄備鉤陳之翊衛蔭華蓋之扶疎前星者儲貳  
之體後宮者正妃之餘御宮典儀於椒寢柱史執簡於  
彤除文昌與上將齊列司祿與貴相同墟平獄訟於大

理筦喉舌於尚書四輔煥而八風俱暢三台耀而一德  
相於泰階則長明玉燭斗魁則獨運帝車別有太微之  
垣天市之樞五行迭王四氣旁敷中施黼座外設直廬  
執法臨於廷尉謁者值於鴻臚九卿宣猷於省寺諸侯  
述職於疆隅依烏者郎官之位少微者博士之徒宗正  
之親疎有序虎賁之警蹕無虞造父扶輪而先路王良  
策馬而前驅咸備官於層漢同展采於亨衢南有清廟  
高騫靈臺邈倚天闕崔巍端門宏邃張為厨以觴客柳

為宰以和味翼為禮樂之官星為衣裳之筭長沙卜壽  
考之徵東井掌水衡之事積金積帛鬼者所以察奸左  
轄右轄軫者所以主騎五車燦而軌道平三光明而皇  
風被西有天街之上車舍之中九旂縈拂三柱玲瓏奎  
者武庫之備婁者苑牧之充參者偏裨之任亦為鈇鉞  
之雄胃為廩而司穀昴為耳而司聰畢為罕車有菟苗  
以肄戎事觜為軍候有葆旅以衛王宮雕弧靜而師中  
貞吉南極見而天下時雍北有爵祿之斗文章之璧危

司陵寢虛司祭鬴牽牛亘乎闕梁離宮起於營室須婺  
則二女同居天孫則七襄終日羽林則壁壘清嚴匏瓜  
則魚鹽纖悉河鼓掌閭外之戎旃離珠典宮中之祕飾  
有雲雨之宿以沛其恩波有雷霆之星以威其淫慝東  
有房為外府心作明堂蒼龍超躡四馬騰驤箕好風而  
翕舌氏涸水而成梁亢則燕居斂福尾則螽斯凝祥後  
牽前衿市樓測其虛實左李右將大角控其中央攝提  
者甲乙之躔所以直斗杓而建月令析木者幽燕之次

所以垂景曜而福

帝鄉又有列象成文順天左循王填星於土德播粒食  
於生民水為辰而司智木為歲而司仁火為熒惑五事  
之所以用又金為太白五味之所以作辛他若竹林建  
樹咸池漢津如覲豫賞于彼清旻器府縹緲鼓吹繽紛  
於奏廣樂于彼鴻鈞熊羆虎豹之類江河園苑之倫既  
繁錯而難舉亦瑣碎而不陳靡不規摹於太紫拱衛於  
北辰乃知中宮者至尊之位泰一者至貴之神可以覆



育於萬物可以函蓋於九垓故有定位焉崇上卑下亘  
古不遷有懸象焉日升月恒貞明遞宣以言乎日純乾  
之用太陽之質扶桑以升細柳以入跋烏三足而能飛  
建木千尋而自植黃道赤道於以紀其經行高春下春  
於以標其晷刻以言乎月陰教之修內德之協顧兔在  
腹方諸含液驗魚腦而光盈畫蘆灰而暈闕哉生旁魄  
辨候於玉斧之宮三珥重輪表瑞於金樞之穴日者離  
之精月者坎之靈五星天之緯四七天之經其去地也

十有九萬七千里而遠其周天也三百六十有五度而  
贏日月則有四遊九道之可測星辰則有三百二十之  
可名有運行次舍之度有遲速守犯之形璿璣垂其模  
範渾儀合其規程穹天昕天之說皆已闕其義周髀宣  
夜之術詎能得其情若夫直專動靜天之體也聖人則  
之以盡性剛健中正天之用也聖人法之以出政七曜  
於是乎貢其休徵九霄於是乎彰其瑞應煥乎連璧之  
符麗矣編珠之映甘露之味如膏絳河之光如鏡如星

非星焱焱而吐輝如雲非雲郁郁紛紛而呈慶榮  
光之燭五老所以祝唐堯復旦之歌八伯所以頌虞舜  
況夫

上聖垂旒至誠格幽剛柔協喜怒刑賞毘春秋天不愛  
其道神若碁之謀膺靈眷兮璇極集珍貺以介邱瑞穰  
穰兮山之委福浩浩兮川之流恍昭回而在上垂紘縵  
而凝休觀諸象而可悟揆以理而不浮信乎天人之感  
應為甚速夫何俟乎保章馮相之屬用推測以相求

禹貢山水圖賦

原夫禪通疏仡炎帝軒皇迭主五候區畫四方啟中天  
之景爍闢邃古之鴻荒濯文明於昏墊奏府事於懷襄  
德無間於夏后功尤高於姒王按山川之故牒考禹貢  
之舊章熙鴻號於萬禩耿徽音於不忘彼其千岩霧列  
萬壑星屯歸墟海若衍脈崑崙四瀆者百川之長五嶽  
者衆阜之尊遠近崇卑有道里之可考決排疏濬有脈  
絡之可論合之則四載之績以著分之則九州之跡斯

存若乃陶唐舊都冀州名境河為之川汾為之浸大陸  
為之數恒霍為之鎮析城則茗茗百雉底柱則亭亭千  
仞王屋則諺若翬飛太行則邈然雲峻有呂梁孤岐壺  
口雷首之峻嶒有衡漳恒衛滏洹洙淇之縈映遼濡滹  
易夾碣石而南來孟津大伾歷覃懷而東定寔三面以  
距河臨三州而標勝西為輿府是曰雍州擘金天之高  
掌鑿黃河之迅流溯積石以經始歷龍門之阻脩岍山  
者吳嶽之表終南者地肺之邱荆岐則兩山咸秩鳥鼠

則二物同遊惇物則連綿列岫豬野則苞衍平疇亦有  
漆沮澶漫澧汭沈浮同濁涇之湜湜入清渭之悠悠內  
控隴右兮西傾朱圉外接朔方兮析支渠搜南則荆河  
厥惟豫域風雨所和陰陽所集榮由濟騰波從洛溢被  
以孟諸承之荷澤澗出澠池之南瀍出替亭之北熊耳  
孕於伊源陪尾枕於桐栢惟洛川之生豕嶺呈神貺於  
九疇兼外方之號嵩高集靈符於二室東則充區濟河  
所歷濟以沮分河以灘出伏見者三在汶上陶邱之界

播疏為九有馬頰鬲津之跡鼓雷於澤所以無橫流之  
虞汎舟於濶所以有織文之入他若專以山稱者惟荆  
惟衡荊州是名專以水稱者惟淮惟海揚州是徵兼以  
山水稱者華陽黑水之梁海岱及淮之徐據海距岱之  
青青則淄出萊蕪濰出箕屋海濱廣斥瑯琊曠邈汶水  
浮航萊山作牧賓日馭兮嶠夷聳天門兮岱麓徐則沂  
因艾谷淮自胎簪東原高壤大野卑洿彩翬羽畎嘉穀  
蒙陰孤桐生兮嶧阪浮石產兮泗潯揚則三江為襟五

湖為帶震澤扼婁松之吭彭蠡承岷嶓之滙羽毛齒草  
之所生篠蕩瑤琨之所萃攬竹箭兮如林棲陽禽兮斯  
在荆則江沱潛漢大別內方東陵坦迤三澨微茫原名  
敷淺水號滄浪跨七澤兮雲夢括九江兮澧湘供菁茅  
兮上國納篋輅兮三邦梁則江漢上游濫觴之地為源  
為流乃道乃藝徑褻斜而桓是來旅蔡蒙而沫可治合  
黎流沙弱水之所循南海三危黑水之所至有銀璆磬  
錯之奇珍有熊羆狐狸之文罽觀底績於和人知成功



之匪易於是曠觀九野溥覽八紘廣輪異數流峙並呈  
融者為川瀆結者為邱陵東西者其緯南北者其經有  
北境南境之別有北條南條之形北則河濟為之宗而  
伊洛淮渭為之次南則江漢居其重而沱潛漾沔居其  
輕靡不通委輸於巨海走筐篚於神京然後知聖人之  
功德有以補天地之危傾故其心非不順物土之性而  
灑沈澹災一代之治功斯備非不公天下之有而以下  
奉上萬古之分義攸明所以櫛沐而胼胝勞神而殫精

以隨刊為疏導之竅會以封濬為賦式之權衡迄今規  
撫曩烈軌則前型披

皇圖之式廓荷天衢之載亨察朝宗之大勢審會同之  
凡情見夫同規而積氣兮乾樞何以永平振維而舉絡  
兮坤軸何以永成厚生而利用兮歌頌何以洽於風聲  
則壤而弼服兮梯航何以達於寰瀛益昀昀禹甸之疆  
理亦芒芒禹迹之方行探岫嶺之瓊宇兮扶宛委之瑤  
局緬塗山之玉帛兮覩河洛之澄清能無景企兮玄圭

之聲教遐慕兮明德之登閔

南郊賦

昭昭璿極乃眷

聖皇象緯輝煜圖書亮章軌乾度以順則運璿樞而履  
長賁天哲於四表覃聖孚於八荒金繩綠冊之祕龍圖  
雀簡之祥皆丁辰而逢吉咸滋大而寢昌自非寶錄游  
申神符潛告介以純禧熙之鴻號奚亶錫於蒼穹用靈  
承於元造孰有感而不彰孰有所而無報爾乃詔宗伯

采儒臣肇吉禮脩明禋暢月穀旦至日良辰玉杓北指  
金翼南踐芸芳叶候葭動迎新舉南郊之盛典答景況  
於高雩於時六宇澄鮮萬象峻潔緹帝肅除壇壝儼設  
警雞人而夜嘑嚴巾車而道迺弭靈蚪以挾輪戢翔螭  
而擁轍影翠羽之葳蕤飾紅葩之狎獵蹇鳳蓋以騰文  
捎虹旌以奮鬣颯迴文而沛艾旋披雲而嵒嶸絳幄青  
城彩旃綈綈嘖嘖鸞聲鏘鏘玉節百辟卿士鵠峙而趨  
班三事上公駿奔而陪列田燭密而曉星稀仙佩鳴而

曙鐘徹

乘輿奉引霈然爰發乃輯粹想存清衷薦蒼壁虔元宮  
介圭杼首大裘卷龍升乎泰壇之上以即於園丘之中  
抗雷鼓之節奏展雲門之舞容韻孤竹之妙管絙空桑  
之雅桐眠雞彝兮黃目滌牲駒兮錦幪擷玉禾兮仙閭  
採黑秬兮神嵩泚明水兮茅三脊煇芳蕭兮烟九重達  
幽馨兮郁以烈燭神光兮昭有融懿芬晃朗盼嚮豐隆  
配以

聖祖躋以

神宗顯謨偉烈峻德巍功恍對越而在上與峻極而侔  
崇既麟麟而炳炳亦肅肅而雝雝禋燎之事具舉禋祀  
之禮告終然後澄慮儲精淵渟岳嶷元扈總章瑤題璇  
室三靈降釐百神受職感碩麟兮雙舸蔭卿雲兮五色  
甘露如珠兮自零朱草不根兮自植懸象著明正祥翕  
赫恍忽無端溟滓何極蓋

昊天者至尊泰一者貴神其號為耀魄其居為紫宸分

曜於日月布秩於星辰有司中司命風雨之代序有寒暑水旱四時之遞因所以權輿化育主宰洪鈞拓基錫統凝福呈珍雖冲漠之無朕寔陟降之是親故醴醕非不旨也而元酒是儋雕幾非不麗也而素車是陳纂組非不美也而疏布是巾莞簟非不安也而蒲越是茵於以見大禮之不褻至敬之無文惟寅清而敦樸兮乃可以交神明而上接於無垠若夫上辛祈穀四時迎氣大雩有禱大亨有祀靈威赤燁之殊招矩叶光之異名見

於緯書事傳於載紀非比秩於南郊豈同儀於

上帝至若寓駒泰峙權火甘泉卜基委粟營宅洛川顯  
慶開元之世至道元豐之年亦有報本與反始非無玉  
帛與牲牷襲方士之譌說承禮家之訛傳代有得而有  
失制有草而有沿有陟配獻享之謬有同牢共食之偏  
有曠數歲而一舉者有遣祠官而攝事焉豈如鉅禮修  
明鴻儀詳正舉不曠時躬親致敬二郊之兆域燦然萬  
古之典章斯定可以孕育百王網羅千聖潤色舊章甄



陶前政迓貞觀之休徵膺昭回之顯命輦瑤厯於丕基  
啟瑞圖於景運於是考庸世室受策介邱頒朔象魏施  
惠神州定三統之建稽五德之疇明堂辟雍緝熙之化  
洽升中巡狩廢墜之典修馳驟於仁義之林藪浸潭於  
道德之源流含咀於藝文之精粹斟酌於儒雅之諮諏  
芳烈扇遠珍符闡幽祥風並翺和氣與遊被光華於四  
表垂厯服於千秋末臣揚扆於盛世用敢作頌以颺休

永年厯法賦

惟

聖朝之受命麗璇穹而凝極援神契之喬皇握乾珍之  
翕翫三階平而如砥五候循而勿失覩貞觀之有符信  
靈承之是即顧乃

宸慮遠凝宅心旦明遑然如未逮凜乎其勿勝協之以  
五紀驗之以庶徵寓機緘於儀器研象數於規程抉元  
微於罔象曙幽遐於至精詔馮相保章之氏窮周髀宣  
夜之情啟索籥於銅渾兮振綱維於玉衡植土圭之崇

表兮筦星球之奧局吹葭灰於緹室兮量黍米於陽城  
登靈臺以辨物兮仰峻極以揆形於是祕器成圖儀具  
巧思殫新推著微顯咸該洪纖畢舉則盈虛躔舍之常  
審贏縮疾徐之度析分至啟閉之經次寒暑晦明之序  
勾股則以三角法為精詳交食則以十六求為叅互推  
凌犯則無時差氣差之除按氣朔則無里差歲差之誤  
九道則黃赤迴環四遊則東西分布辨中星於昏旦之  
交建月令於攝提之部所以永命而祈天取新而去故

粲粲兮合璧而連珠班班兮金章而玉節錫嘉名以永年介純禧於

皇祚若夫裨竈梓慎之術甘公石氏之傳景初承太和之舊鄧平校洛下之偏一行垂聲於大衍元嘉抗迹於承天王朴之欽天有準守敬之授時不愆非有蠱管之合詎免舛謬之沿豈若斯厯蔚為典式推步有恒宿離不忒綜六術於甲寅會五星於營室闡氣母於炎帝顯皇運璿璣於堯天舜日探瓊策而鏡千秋兮可以卜世

而卜年吹玉琯而調八風兮可以中呂而中律況夫

睿聖臨朝珍符景昭滙瑞苞於穹宇升景貺於層霄卿  
雲爛兮北闕甘露降兮南郊吐榮光兮無際叶玉燭兮  
長調莫莢迎辰兮無勞銀箭鳳凰司正兮如聽仙韶方  
履長於億萬斯年之歷數又何有於二千餘載之殷遙

西山積雪賦

攬西山之勝概見岡阜之岿巍敞丹梯之遠色插蒼靄  
之崇標皎積雪之在望凝餘寒之未銷漾清暉之水木

涵澄旭於林臯助景物之蕭曠增岩阿之沈寥昔之菡  
萏紛敷芙蓉競秀朝爽迎人夕霏展岫掩映兮如花參  
差兮如繡翠微仙庭香山化城礪戶幽迴峯巒杳冥玲  
瓏兮瓊闥窈窕兮雲屏因高就下嵌空封罅爛兮炫景  
粲兮照夜樹青葱兮玉泉竹檀欒兮潭柘舞銀海之虬  
龍展璫綃之圖畫吹雲兮繪粉流光兮弄影壁掛兮珠  
聯輝山兮媚川遠而望之如瑤臺月艷兮游飛仙近而  
即之如藍田日暖兮生朝烟恍兮忽兮既似翠羽啁啾

兮羅浮天髻兮髧兮又似夜光錯落兮西崑顛當其遙  
空作霽翔鳥方吐晃朗晴嵐依微遠樹綴霜葉而增妍  
點林鴉而可數及其夕陽在山悄然人境殘虹散彩餘  
霞流映帶暝色而猶明耿寒光而不定夏仙籟兮無聲  
委金波兮有情風颼颼而愈冷月澹澹而彌清遶南枝  
兮孤鵲警空山兮獨鶴戢寒羽之差池感羈心之搖落  
鳥道兮谿研燒痕兮橫斜狐兔淒迷於曠野獵火閃爍  
於平沙樵逕兮斷絕墟烟兮明滅岩扉寂寂兮長扃蘿

磬泠泠兮相答乃有曳履幽人行吟騷客藉草扶筇披  
榛振屐抽灞橋之祕思賡招隱之新什發逸響兮無窮  
託深情兮何極亦有連輝華省挂頰仙臺玉珂曉度粉  
署辰來和陽春之麗曲騁梁苑之清才寄遠心於邱壑  
鏘餘韻於低回豈如璇題金屋高居遠目澄輝兮送迎  
絳霄兮縈屬撫軫兮幽蘭興歌兮黃竹揖神人兮藐姑  
探圖書兮羣玉流

睿藻兮芳妍揆



天葩分鮮縟所以凝華積素疊嶂層巒嵯峨天半縹緲  
雲端挺千枝之琳碧擁萬仞之琅玕掇琪花而不落拾  
瑤草而長寒開皇州之麗矚峙寶甸之奇觀援柔毫而  
一寫恍置身於蓬萊方丈白銀宮闕之間

殘菊賦

有序

長安邸中有秋菊十數本媽黃姹紫粲粲可觀曾  
不幾旬凋殘殆盡夫菊貞艸也可以敵霜霰制頽  
齡而且歲晏孰華流芳易謝猶如此矣況其他乎

江潭搖落桓司馬見而傷心庭樹婆娑殷東陽對  
之歎息以今揆昔有由然也爰濡毫而賦之

蕭辰送燠朔氣迎寒清霜夕厲濃露晨溥惜流光之欲  
莫見叢菊之初殘當其金盞方披瓊苞未坼微飈薦涼  
鮮雲漾碧振綠葉之歲蕤綴紺跗之穠密林下兮山家  
重陽兮試花繽紛兮佳色璀璨兮仙葩濯錦鱗於秋山  
籠綺日於朝華一枝兩枝兮寒玉千縷萬縷兮明霞白  
雪兮乍飛征雁兮南歸峯迴兮波屬離憂兮紛觸蘭之

秀兮清微菊之芳兮幽獨懷佳人兮不忘寄相思兮空  
谷蘊蘊猗那為時幾何繁香姜蔓紫豔飄柯同湘人之  
顛顚怨令節之蹉跎夫其抱性貞姜託根高潔耿耿孤  
芳亭亭晚節猶且悴似飛蓬衰如墮葉委三徑之寒叢  
隨衆芳而銷歇況乎蒲柳之質桃李之姿脩靡弱幹往  
苒柔枝能盛年之長保無妍華之早衰當冰霜之摧挫  
恐零落之無時對殘英而躑躅空愴恨於予思

梅花賦

若夫披香之殿重壁之臺千花統砌萬卉羅堦爭春先  
發衝寒早開超羣拔萃獨有芳梅當其仙蕾方胎瓊苞  
未綻裊裊繁條亭亭脩幹餐冰雪之淒清歷風霜之凌  
亂羌不改其貞心亦何傷於歲晏爾乃微陽韻竹弱管  
飛葭勾萌欲坼枯荻未芽權輿氣母綢繆物華東郊將  
駕南枝已花遠韻孤情冰膚玉質世外相期林中獨立  
深雪扃寒橫參耿碧孤夢清遐一枝幽寂彷彿聞香依  
稀辨色日餞雲迎時和景明風催淑氣鳥弄春聲倚樓

笛暖擁帳香溫粧嫌粉浣舞愛身輕何樹非玉何花不  
瓊亦有紺跗翠萼紫蕊紅英綠華仙品絳樹芳名凝脂  
鏤雪異色同榮靡不返魂香寢濯魄瑤京綺因清極艷  
自幽生若乃薄寒未融暝色欲斂林非霧而非烟天如  
霜而如霰初掩抑以生愁旋低徊而入怨倚脩竹以無  
人對流波而自遠空山兮泐寥四顧兮蕭條霏微兮夜  
色搖曳兮仙飈月昏黃而送影露澹淡以凝條緘素心  
兮有恨翳綺袂之無憀蓋其體含高潔性本貞婁天然

之質秀出之姿煖然兮似喜淒然兮自悲嫣然兮獨笑  
悄然兮相思占衆芳兮無銜色老空谷兮人莫知故乃  
即之愈淡挹之愈微清之不濁涅之不淄可以含華咀  
秀揚芬吐蕤移根閨苑振采瑤池扇仙葩之芳烈効鼎  
實於明時豈與夫遲日園林深春樓閣柔木綺靡雜英  
纖弱乍苑兮乍枯自開兮自落藝畹兮幽蘭翻堦兮芍  
藥穠李兮芳菲夭桃兮綽約逞絕代之容顏鬬傾城之  
鉛澤領上天之韶光競人間之標格猗嗟梅也首冠芳

叢霓裁霧剪粉銷黛空雖自矜其國色能無待乎春工  
釀聯珠之甘雨披綴鈴之惠風非栽培之有意孰妍悅  
而為容願東皇之長護無致惜於飄蓬

帝京元夕賦

翼翼神州巍巍

帝室邈倚丹霄規摹紫極萬瓦翬飛九衢星密民物恬  
熙謳歌洋溢觀率土之升平奉

宸遊於茲夕茲夕何夕厥惟上元孟陬之吉春王之尊

一歲之首四氣之原青陽肇令始和布恩綵鳩施惠白  
獸受言以屆於是稱令節焉於是仙琯調風澄暉散旭  
天朗氣和春明景淑林雪盡而銷寒河水開而圻玉湛  
仙掌之金波飄御溝之文縠魚噉喁以泝流鶯翩翩而  
出谷梅弄色以初花柳垂條而始綠萬象交泰百昌競  
呈萃以樂豫兆以豐亨麗以皓月綴以華燈千枝吐艷  
萬炬攢星素蟾銀魄顧兔仙輪若乃宮觀鬱盤亭臺層  
構青瑣丹墀雕楹藻鏤玉題交輝銅鋪錯綉銜照燭龍



流光駕翬花不落而長妍夜未央而如晝藹佳氣之蔥  
芊羅瑞烟之粉糝祥光凝兮楸梓開仙響臻兮韶韻奏  
慶雲霏兮鳳輦過香霧濃兮鰲山秀以至五都洞達三  
市喧闐星橋火樹寶騎香輶靚粧縟野袷服藻川歌落  
梅之婀娜鬬穠李之鮮妍弛金吾之夕禁誤銅籌之曉  
傳咸追歡於樂歲並選勝於韶年夫其間井悅康寧瀛  
清晏人鮮怨咨家多盈羨士女熙熙宴遊衍衍兵氣銷  
而日月光頌聲作而星雲燦良辰並美景偕臨天寶與

物華俱煥審何道以臻茲知

皇仁之溥徧蓋惟弘基積累醱化齋淪懿以文德洽以  
深仁天波如醴

聖澤如春合天下為一家引六合為一身故天不愛道  
人不愛情蕙脯在圃莫英充庭風皞皞而自古物欣欣  
而向榮月金甌以無缺燈玉燭而長明於是珍貺昭回  
太和絪縕因普天之同樂覩

一人之有慶集五福之繁昌介萬年於

長信賡燕喜於椒房流鴻禧於鶴禁以豫以遊伴與優  
游紫霞陳醕翠駝獻羞却魚龍斥角觥罷楚腰屏齊謳  
頌大脯而露渥聆廣樂而雲流上有景福之賜下有南  
山之酬人間三五之夜天上十二之樓洵同民之為樂  
匪細娛之是求末臣頌揚乎盛世用紀美於千秋

南苑賦

有序

南苑在都城之南舊名海子澶漫百里夙號沃瀛  
果蘇千區於焉滋植珍羣異羽充牣乎其中複道

行宮紛縈乎其際左思所云遭數為圃值林為苑也蓋其川原曠邈林澤逶迤秋水如空春波似縠烟霏夕羃霞綺晨飛雲淡淡而四垂天蒼蒼而一色鳬鷺唼葉依然太液之池魚鳥親人寧數濠梁之境至其繚垣廣袤馳道周遭接雉堞而非遙瞻龍樓其不遠雲臺九仞丹氣迴環春樹萬家清暉映帶匪樸匪斲如跂如翬土不雕鏤木無緹錦有唐后茅茨之制同夏王卑約之風

皇上聽覽餘閒時臨是地省耕觀穫常行補助之文表  
貉弊禽兼肆菟苗之典殺不盡物樂以同民一豫  
一遊皆成法度每至青陽之月白露之辰都人士  
女靡不延頸跂足以望屬車之塵焉昔周人之歌  
靈囿樂翔泳之沾恩漢臣之賦上林美陂池之弛  
禁況在

聖明之代可無頌述之篇臣雖不敏敢獻斯賦賦曰  
天下為家宅中作縣握瑞凝珍貞符考憲錯繡壤於堯

封廓黃圖於禹甸

皇居拱於北辰靈囿開於南苑俯洲渚之憑隆對河山  
之曠遠地臨冀野水滙桑乾山從西夾海似東漸噴日  
薄月纓岡帶川亘廣輪者一百餘里通灌輸者七十二  
泉乃有嘉卉千畦瓊蔬萬彙絢葉紫莖紅蕤翠蒂羅元  
圃之綺蔥植青津之琅菜朝含露於芳葵夕負霜於玉  
薤梨棗之沃榛栗之饒鮮苞蕢實珍液金翹青綺門前  
五色並呈瓜瓞赤瑛盤內三春首薦櫻桃又有瑞獸成

羣仙禽接翼露犬紉牛黃支白澤翠羽之翰丹青彩翟  
之輝金碧沙融而並下鵲鵲波暖而飛來鸛鵒於是環  
以列衛繚以周墻離宮錯峙峭宇相望綺疏藻井月地  
雲窻金鋪煥彩壁題耀光可以挹秋爽可以延春陽可  
以肄蒐狩可以閱畊桑

皇帝翊七萃於鈎陳御六龍於雕軫指芳樂之平川接  
華林之勝景鳳蓋平飛霓旌斜引野曠城遙林長路迴  
層臺雲繞曲榭星懸波明仙仗風送繁絃寶扇抱月金

爐挹烟馳道則五里十里廣殿則七筵九筵時省耕於  
東作每觀稼於西田於時麗日遲遲和風習習花動香  
來桐垂乳滴雪繭盈川紺轅在籍桑柔而鳩婦頻呼草  
淺而雉媒始出良耜盈郊懿筐在室洒靈雨於萬家滅  
湛恩於九陌徂暑維秋金天火流涼飈乍肅寒潦初收  
紅疎棗圃綠蔓瓜疇見銍艾之如雨喜汙邪之滿篝登  
神倉而歲有挹

聖澤而雲浮若其露暖當空霜黃遍洒二日其同三時



多暇九節歌狸六閑調馬並驅甫草之中并試長楸之  
下巧心穿葉迅足騰光千乘競捷萬騎爭驤按鷹大野  
弋隼高蒼發六犯之同穴貫雙雁於連行雖舉烽而行  
醵寧合圍而掩蔽既乃布惠展儀儲精凝慮幽風在前  
虞箴當御翱翔乎禮義之園游憩乎詩書之府德彌性  
以有常樂同民之是與况復樵蕪不拒雉兔斯求有陂  
池之樂利無禁籟之呵留丹水紫淵無勞於填塹蘭唐  
蕙圃不假於收采制猶狹於文囿歌先傳於夏謳願奉

翠華之幸長承

清蹕之遊

太極圖賦

并序

太極圖者宋儒周氏濂溪之所作也自易言太極  
至周氏演為圖以授程氏明道伊川闡河洛之微  
言接洙泗之遺緒千聖之統萬化之原於茲益明  
厥功甚鉅按太極圖說無極而太極乃是道體之  
本然而由後天以合先天定之以中正仁義主靜

立人極者其功全在於聖人此周氏作圖之本意也因推其義以為是賦焉

原夫形象之始物則之初權輿化育函蘊苞符泯聲臭於帝載筦索篇於天樞惟太極之為體實衆理之所儲宰萬化而非有體至妙而非無首發明於大易繼闡繹於先儒固演之而為說亦揭之而為圖自非灼見夫道原者其孰能以與於此乎爾其一氣既分二儀初立乾直以專坤翕以闢運元轂以同規控方輿而奠極資始

生以何窮位清寧而咸得孰主宰是而德合無疆孰綱  
維是而健行不息萬象森布列曜著明宣以四氣麗以  
五行氣陰陽而互宅質剛柔而並呈察廣輪之異數審  
流峙之殊形孰根柢是而往者不匱孰機緘是而來者  
常新或動或植分區別質誰為為之而生物不測或濁  
或清受氣含靈誰為為之而嬪化不停是惟太極立乎  
最先孕育氣母翕張道緘其體廓爾其理渾然靜以生  
動其通也不滯動以根靜其復也不遷恍兮忽兮非方

所之可執冲兮漠兮詎端倪之可言氣乘機而日出體  
儲用而內涵卽一物而各具會萬物以同原如一畫之  
開天在在皆易如萬川之落月處處皆圓此太極之為  
至妙而斯圖之所由傳也若乃無極之真二五之質磅  
礪絪縕妙凝保合其在於人獨靈於物既受性而秉彝  
亦形生而神發滙五德於靈淵分三才於天臬究睿思  
之若神知聖功之作哲雖一本而萬殊豈同途而異轍  
然而修悖各異順逆攸分性近習遠道疎物親孰修道

以垂教孰明善以誠身理雖原於太極功尤待於聖人  
故乃源流歸本披枝見根旨以說暢義以圖陳揭濂洛  
之性旨闡洙泗之道真啟聖朝之統緒資睿學之高深  
於是流連披覽緝熙懋勤金追玉琢日引月伸乃體無  
而宰有乃執一而御紛蘊之在躬兮仁義中正措之在  
世兮禮樂政刑化普記兮無外德含弘兮好生播太和  
兮盎溢流元氣兮齠淪風渾噩兮彌古俗恬熙兮愈淳  
浩浩兮識至治之有象蕩蕩兮恍太極之無名攄管窺

以仰則兮吾又何以測廣運之所存

經筵賦

有序

皇上體備生知聖由天縱  
媿軒皇之敦敏邁岐石之誕  
登勤政愛民親賢好學千聖百王之統悉滙於心  
傳五經六藝之文咸通於神解  
牙籤夜擁窮甲乙而忘疲

彤幄晨開歷春秋而靡間歲  
當協洽月在夾鍾爰啟  
經筵再陳講義闡中和之性理  
探河洛之微言固不

敷揚用資啟沃雖蘊含高厚非蠡測之能窺而運  
際文明寔頌揚之莫罄末臣幸逢盛典載抃載欣  
敢竭疎庸敬獻賦賦曰

猗

聖皇之受命接道統於羲軒闡珍符而祕啟探寶筮而  
苞宣紹唐虞之曩烈挾河洛之遺編道下濟而交泰德  
健行而協乾殫就將於夙夜勤學問於

經筵於時麗景垂天青陽協律獻節初開仲春始吉命



宗伯以諏儀咨靈臺而撰日立銅史以司聲候玉繩而  
辨色開閭闔於彤扉拱雲霄於紫極覩鳳蓋之晨飛見  
鑾輿之曉出乃有十行鹵簿三署嚴更翔鵷列陞振鷺  
充庭曳琴離之虹旄飄狎獵之霓旌織如雲而五色扇  
似月而重輪建九旂之仙仗會千官之火城丹墀兮絳  
闈綺疏兮交錯瑞靄兮細縕祥光兮景爍宮漏裊兮出  
花遲爐烟縈兮垂柳弱煥奎壁兮旭日光奏蕭韶兮鈞  
天樂

皇帝乃御保和之殿陳九擯之儀發琳琅之祕吐珠玉之輝上公執簡名卿侍幃微言析奧深心剖疑搜義文之精蘊窮性道之淵微既海深而嶽峻亦

天高而聽卑雖韜鐸之有採詎塵露之能裨冀芻蕘之可擇庶葑菲之不遺乃罄葵心乃攄竹素仰企

淵衷昭茲

王度披玉宇之祥風挹天章之調露夫一德以颺言瞻九重而披素抗古迹而為昭荷天衢而生慕若乃牙籤

玉軸錦帙芸編交分循覽日昃流連掇仙葩之璀璨挾  
睿藻之芳妍灑十行之珠翰染七襄之寶箋洽文德於  
四國披風聲於八埏學既隆而加殖心善下而彌虔豈  
與夫麗正邇英石渠白虎訂異叅同蹈常襲故修誦說  
之虛儀飾師儒之文具相絜量以齊觀可同年而共語  
也於是儲精冲穆宅思優游考庸世室受策介邱定三  
統之建稽五德之疇明堂辟雍緝熙之化洽升中巡狩  
曠墜之典修翱翔於仁義之林敷浸潭於道德之源流

含咀於藝文之英萃斟酌於儒雅之諳諷扇芳烈以屈  
遠貺貞符而闡幽被光華於四表鞏歷服於千秋末臣  
揚抗乎盛世用敢作頌以宣休頌曰於鑠我

皇德茂隆兮緝熙夙夜昭有融兮作君作師亶明聰兮  
允恭克讓心謙冲兮講幄時啟亮天工兮思以作睿懋  
聖功兮化被六合流醇風兮

一人有慶萬方同兮

上林春燕賦

美上林之巨麗擅漢苑之芳菲萃九天之淑景蕩二月  
之晴暉草成茵而萋碧香生樹以霏微攬韶光之在望  
見彩燕之交飛爾其翠袖繽紛紅襟容裔紫綺裁裳元  
雲剪袂翔不千仞來逾萬里警霜露以言歸隨陽和而  
自致雙棲玳瑁之梁並集珊瑚之砌既乘候以知幾亦  
託身而得地乃若禊辰未屆社日初臨綠楊簾幕紅杏  
園林汎崇蘭之曉吹釀微雨之春陰啄芹泥之清潤蹇  
蕙幌之深沉拂差池之妍影弄呢喃之好音喜故人之

無恙傍舊壘以重尋至於綠水銀塘游絲芳樹冉冉殘  
英依依落絮乍高兮乍低自來兮自去受風兮欲斜蹴  
花兮如語惜綺節之漸頽對流光之將暮似展轉以含  
情向斜陽而欲訴豈如借棲閨苑託質瑤宮芝田蕙圃  
藹日光風陪瓊林之游讌穿玉樹之青蔥憩藻房之婉  
孌度珠綴之玲瓏掌上呈姿並矜舞態釵頭比玉低颭  
歌容彼夫列栢之烏檜榆之雀翠羽翩翾雪衣綽約雕  
籠閉而長閑金彈飛而乍落雖飲啄之自娛何樊籠之

足樂詎若烏衣艷色大厦重閨棲游畫棟翔集花茵風  
恬巢穩泥暖雛新祀高禩而迎候秩元鳥而司分天假  
之以羽毛人貯之以連雲與遷鶯而並起長流玩於芳  
春

朝會宴饗樂章

太皇太后升座奏永平之章

嘉樂

聖母德容穆穆合撰坤元以涵以育鑾輅在陳玉衣有

郁展哉

皇儀禮明樂淑億萬斯年受茲介福

朝賀奏丹陛樂

彤庭弘邃曲禮攸崇六宮式序千官景從慈雲流蔭下  
帡上幪自南自北自西自東萬方來賀曷不肅雍昭哉  
聖孝其樂融融

還宮奏壽平之章

天佑



皇家景命渚申宮闈重慶繁祉川臻詒我有穀用啟後  
人錫釐衍祚蟄蟄振振六合內外莫不尊親

皇太后升座奏豫平之章

有懿

慈闈惟天下母厚德之符含弘九有式嗣徽音以昌厥  
後福祿來同如山如阜我龍受之遐不覃厚

朝賀奏丹陛樂

品物光亨兩儀清泰展禮有容式瞻嘉會金石相宣貫

珠編貝思媚思齊德音四沛以介繁禧萬年保艾曰壽而臧曰昌而大

還宮奏順平之章

百禮既洽燦然有章瑞雲承蓋麗日舒長以天下養怡愉未央言旋彤幄鳴豫儲祥

一人有慶萬壽無疆

皇后升座奏淑平之章

天清地寧儷尊

宸極表是王風

母儀萬國體順含章茂明內德福履永綏迺燕迺翼

朝賀奏

采章有蔚令典告虔還規折矩鳴玉璆然恩流樛木澤  
被雲天威儀秩秩率履無愆修齊我

后地道承乾

還宮奏嘉平之章

椒宮奕奕陰教修明禕衣有曜環珮和鳴禮容孔恪萬

福來成闕睢之化流美風聲

皇太子升座奏昭平之章

煌煌謨烈受天顯命啟佑元良萬邦以正日重其光星  
輝海潤寢熾寢昌無疆惟慶

朝賀奏

胄筵式闡雲物呈珍金相玉粹光輝日新濟濟多士用  
備宮臣有馮有翼大猷是遵履敬思孝媚茲

一人

還宮奏咸平之章

青宮誕啓有秩其儀正體毓德百祿是宜繼明以照景  
光淑熹垂緒萬年翼我丕基

皇帝升座中和韶樂作奏隆平之章

朝會

赫矣天鑒眷求惟聖保佑我

清既集有命假樂

大君天位以正蒞下有容鑒於萬方念茲崇功駿命孔  
常

還宮奏顯平之章

於昭

三后誕降世德疊疊我

皇克艱袞職治定功成中和建極龍飛在天鳳儀於庭  
式秦王夏垂億萬齡

萬壽升座中和韶樂作奏乾平之章

二儀清寧三辰順則維

帝凝命函冒區域仁恩廣覃至於動植久道化成隆功

駿德

聖人多壽年世萬億

還宮奏太平之章

鑒觀惟德丕命惟

皇肇茲壽域薄海要荒物性茂育民俗樂康冠帶之國  
望斗辨方曰惟萬年同於昊天

元旦升座中和韶樂作奏元平之章

於穆

元后敬授人時四時和令三陽肇基鸞路蒼龍載青其  
旗迎氣布德百工允釐行慶施惠及我烝黎

還宮奏和平之章

有奕元會

天子穆穆蹕蹕羣公至自九服正朔所加海外臣僕率  
土惠懷萬民子育千齡億祀永綏第祿

冬至升座中和韶樂作奏遂平之章

朝符在握道轉鴻鈞天心見復物始資元景長舜日紀



協堯春玉琯應瑞寶歷肇新衆正在位輔翼

一人

還宮奏允平之章

萬國在宥一陽斯溥淵默臨朝天職修舉君子道長駢  
珪聯組占日書雲產祥降嘏宜暘而暘宜雨而雨

小宴升座丹陛大樂作奏協平之章

聖皇涖止穆穆皇皇百爾卿士章服斯光吹笙鼓琴式  
燕嘉賓萬福既同歸美

一人

還宮奏興平之章

湛湛露零維豐之芑猗歟在公思皇多士宴示慈惠以  
洽百禮敬慎威儀福祿來只

郊祀導迎奏祐平之章

皇天有命

列聖承之我

后配德文匡武綏海隅寧謐神靈宴娛於萬斯年流慶

降登

廟祀道迎奏禧平之章

於皇紹烈累熙重光銷鑠羣慝我武奮揚肅肅清廟  
我奉璋璽斯馨祚命無疆

諸王百官謝

恩見朝丹陛大樂作奏慶平之章

皇覆萬寓品物咸亨九賓在列百譯輸誠濟濟卿士  
式造在廷

帝仁如天

帝明如日親賢任能愛民育物禮備樂成聲教四訖

外藩謝

恩見朝丹陛大樂作奏興平之章

天盡所覆以畀我

清我德配命涵濡羣生萬國蹈舞來享來庭俟俟蹲蹲  
視彼干戚天威式臨其儀不忒

聖德詩

有序

臣孫遜稽首頓首上言伏惟

皇帝陛下即位以來於今二十年敬天恤民敏學勤政夙夜孜孜圖求治理西殄關隴之寇南定甌閩百越之叛以除去民害今又討誅逆賊吳世璠盡收六詔之地布寬大之

詔與天下更始東西朔南幅員萬里一乃心力莫不悅服作息之民跂行蠕動之物霑被

皇仁咸得其所太平之符千載一日

臣

備員翰林出入

闕廷之下親見

皇上文武聖神功德甚大推校古今無與為二因伏自

思念翰林之官執筆札以事

上詠歌頌述乃其職也輒不自揣度竊取古義恭撰

聖德詩一篇上呈

睿覽雖詞理淺陋而據切事實庶以宣明

主德傳信於天下後世詩曰

皇帝聖武天下畏懷赫斯一怒於滇之池惟彼滇池介

於南陲逆臣三桂狡焉盜魁挾其驕黠徼亂自資腊人而噬為狼為豺毒則不翅矜寡有辭

皇帝曰吁庸可貸是龔行天罰我不敢私爰命宗臣九罰是加中璋七寸鼗鼓熊旗兵以義起誠不在多日舍三十不棘不舒一舉湘楚再下牂牁降人載路鏃刃不試桂冥殛死身為灰糜凶孽世殫稔惡不回怙恃其險以抗於我惟官臣泰鼓行疾馳塔及毓榮各以兵隨會於城下環其外俾夾弓絜矢衝車戕我芻蕘不淫惟敵

是求紬臂搔吭胸腹潰離羣醜搖心則內自猜還相告  
語齋咨涕洟釜魚檻獸其何能久天地之大獨外我儕  
胡不思服束身自歸生縛巨憝即刑有司璠見窘蹙勢  
益孤睽退自刎頸幾免剗十月戊申城門大開斬送  
其首皆縻以來有拳有桎厥囚纍纍號而勾命骸骸悲  
哀遂入其城撫而諭之殲渠宥脅毋怛而疑滇戶十萬  
嘔呀歡喜農不釋耒市廛不移脫去砧俎以教以嬉昔  
在閩越國之藩維負國恩寵實相黨比如木之葉如蔓



之滋膠結牙互不可芟夷乃蹙其本乃伐其枝臨以一  
旅莫余距違罪人斯得戮於甸師隴蜀之阻塍埒峻巖  
大師之屈若蹈平地既銘劒閣山川永底有逋者寇竄  
處海涯戈船所指翦為鯨鯢鱗介之族襲我裳衣滇之  
曠誅為日久矣今也戡定六合一家是惟

皇帝與神合謀制勝於中發策決機豈無立懂

音芹勇也列子

以立熊羆虎豹進止倚伏一稟成規功烈甚大無與陟

躋師武臣力莫之敢尸幕府告捷列上其事函首萬里

至於京師與衆共棄揭諸九達乃蠲吉日獻功報祠告

於

宗

祖

天神

地示設大愷樂千戚幢麾牲牢玉帛燔燎瘞瘳殷禮肇  
舉景光淑嘉肩如有聞肝鬻況施乃

御正殿頒下

詔書大赦天下悉與滌除減免租稅已責去譏收養介  
持賑貧恤災策勲軍帥析組剖圭慰勞吏士優賚有差  
褒顯死事易名贈階推恩中外周徧廣該公卿大夫洎  
我士民踊躍抃舞幸際昌期願上功德升之介邱並集  
闕下進而致詞

皇帝之德不殺而威惠此南國安民豐財以懲不恪懋  
然知畏永永率俾無有效尤

皇帝之德仁育義裁并包兼覆細大不遺泰遠於東大

蒙於西朔南攸暨膏澤滲滴

皇帝之德合撰兩儀五緯順序暘雨曰時年以屢豐萬  
邦以綏動植之類罔不怙熙

皇帝之德止於孝慈以天下養融融怡怡我翼我燕我  
裕我垂惇叙姻族澤及天胎

皇帝之德敏而徇齊典學終始釋念在茲表賢簡能放  
黜邪諛主靜立極以位三才

皇帝之德恭儉身持屏斥浮靡御此繒綈服用澣濯器

不雕幾崇樸敦本四方以化末臣不敏業在頌歌再拜  
稽首作為此詩式示臣庶千億萬祀

賜宴瀛臺紀恩詩

有序

皇帝踐祚之二十年秋七月二十有一日

召滿漢諸臣五品以上及翰林科道官

賜宴於瀛臺侑幣既頒上尊是錫

溫綸疊沛慰藉有加禮成復有蓮實菱藕之

賜羣臣咸醉飽而出捆載而歸感戴

皇仁淪浹肌髓

臣

小臣也猥以備員史官與於旅食蒙

被

恩澤優渥踰涯罄竭涓埃

高深莫報敢循官司之掌竊申頌禱之情敬上七言詩

一首凡千有四百字為一百韻具述

聖天子所以勤勉臣下德意至深至厚庶宣美於今茲

用揚休於來葉詩曰

瀛臺仙衛展

皇儀瑞靄細縕曙色披方切  
怔營瞻紫極忽聞宣喚出  
彤墀濫竽執簡慙官守  
錫宴承筐荷

主慈是日山河殊爽塏  
神州景物正恬熙  
飛葭玉琯鮮  
飈應聽竹金門  
素律移殘暑  
回涼晞湛露  
薄雲籠曉漏  
秋曦共欣下  
濟光明會  
並命來游陟  
覽時西極  
嵯峨銀  
作榜南冥  
漭沆壁為池  
麗城迫接  
朱霞表  
複道斜縈  
淥  
水湄  
太液中  
開波浩蕩  
繚垣遙屬  
路逶迤  
芳蓀橈  
傍圓  
沙駐彩鷁  
舟從曲岸  
艤歛爾乘  
槎翩欲逝  
斗然泛海  
愕

還貽雙丸吐納陰陽剖萬象溟濛宇宙彌似有河源千  
里注更無地軸九垓垂稍窮津溪舒孤眺漸近川原辨  
四維輕櫂隨流沿復泝清暉入抱檐相怡白蘋嫋嫋滿  
湘渚翠荇叢叢雁鷺陂百尺脩綰褰瑤瑁一奩明鏡拭  
瑠璃練江不動纖蘿影珠浦長涵片月姿鼓枻重教緣  
茭蘼疏渠為別貯瀾漪頗饒菱芡紛漂泳最好芙蓉靜  
旖旎嫋質雅堪香霧濯靚粧微向午風歌瑤翰競弄沈  
浮態瓊翼留棲婀娜枝戲葉喁喁騰錦鬣巢莖往往躍



蒼龜舊傳閬苑應非幻親到鈞天却自疑便擬凌霄聽  
廣樂妄希刷羽漸高逵丹梯黛壁還相映紺宇紅亭恍  
在斯鉤盾田塍原綺錯建章宮觀恰星摘樓迎顥氣融  
金掌殿倚晴空敞繡楣緹幕徐褰翔鳳唼畫橋平偃宛  
虹鬚槐陰結蓋苕苕立蘭臭生襟細細吹佳卉芊綿青  
冪歷層嵐縹緲碧屢屨景移枯柏娛澄旭籟發松篁韻  
遠颺是處祥烟浮藻井數行綠樹隱罍愚當軒始熟迴  
波篆遣仗初收拂霓旗文囿何妨來雉兔堯階仍未剪

茅茨因無闕政封章少為有元音刻漏遲倚佩尚思求  
共理揮絃猶復致疇咨

聖朝不隔堂簾義

天語頻申慰勉詞銘鑄由來歸大治恪恭咸此賴

洪施合樽旋

召華裾集束帛驚看

寵賚隨八繭新繅三就采七襄舊紕五總絲比聞

王化追覃葛盡斥穠裝曳薄純況遇

至尊凝黠續僅教致美在宗彝弋綈自御班朝服織貝  
偏充好用資彌覺

皇仁被體重敢渝臣節上衡持蓆衣遂得蒙安燠旅食  
還當示等衰坐接孤卿交履舄人偕伯仲和堦荒蕙纈  
暫解何容裔艾綬爭懸倍陸離小藉柔氈羅席几半拈  
弱錫就盤匱宰夫飾具差鉶豆酒正程材薦醴醢炊出  
雕胡光可鑑漉來粃妝滑於飴饌行鵝炙薌薰品羹芼  
尊菹草木滋糝入茱萸名正醬齊成芍藥作凝脂洩宣

辛烈需椒桂雕鏤廉深視鼎鼎自是烹人調水火非關  
肉吏別澠淄再逢列禦供蕢實適值司蠹授縹瓷會見  
繁昌徵物產并將恭儉訓官師赤心先餉重針棗雅操  
誰當訂座梨的爍珍苞歆秀液繽紛碩果浥寒澌分甘  
乍喜身多幸佐飲真令樂不支蒲阪冬醪含沆瀣鄴湖  
春釀潑醪醺漫勞膳士酌加觶

特遣親臣勸媵卮執法詎須憂多史屬車寧必羨鴟夷  
滌煩頓療相如渴沈陸堪忘暑倩饑強對酒鎗成螺贏

劇憐茗盃瑩蛟螭龍團乳煖春盈握雀舌香濃雪滿匙  
酣洽可無吟蟋蟀低徊又見薄崦嵫侵尋執燭防情溢  
傴僂循牆競職思卜晝禮成皆醉飽自公辭退更將貽  
析醒諸蔗徒虛語消食枳櫛亦謾辭荷本貞姜芥未沫  
蕒尤清苦涅難緇咀餐菱藕能蕪肺凜冽冰霜直沁脾  
豈意枯腸嘗禁鬱他年饑吻厭園葵樵蘇不爨應休璉  
鮭菜長貧庾杲之說餅曾聞思糗餌獻鮮空詫想腴鱠  
賓筵幸覩王林盛俊味還探丙穴奇折俎也知

恩獨厚加邊竊恐分非宜祇慚管蒯孤生賤猥受圭璋  
特達知歸院幾經花底度戴天私作管中窺

德逾軒昊彌謙抑

澤覆垓埏益滲漓勒岱銘嵩升懿烈覲文揚武際昌期  
兩宮尊養無疆慶貳體元良有穀詒夙夜常存惟道岍  
暄寒不輟是

經帷

躬修渾器符乾曜

手纂輿圖奠地祇巡幸只緣親稼穡菑苗端為肆熊羆  
象鞮早已輸琛賫印作俄看折筭咎歲植鷄竿疏訟獄  
時懸豹簾採歲規商霖每應桑林禱淇竹奚煩瓠子祠  
蠲賦恩稠還振廩賜酺

詔下又行廉勤民喜見豐年屢招隱忻將好爵縻上相  
謀謨咸緝亮庶司攜僕各委蛇璇穹恍惚來儲祉宣室  
從容介受釐景況昭回神氣合

宸居肅穆治無為升平歲月多閒暇交泰

君臣有燕私靈沼笙鏞同樂豈卷阿車馬儘閑馳惠露  
翔泳初何限潤及區萌詎有涯絕勝壺觴修洛禊陋他  
簫鼓祀汾雎嘉魚試叶崇邱詠鳴鹿重賡小雅詩願被  
六英颺盛事長歌

萬壽輦丕基

盛矣麗矣使人茫乎望洋向若而歎然細尋之  
叙次周浹音節自然所謂人巧極天工錯者雖  
使揚馬復起猶當退三舍避之何況餘子

尤悔  
菴評



聖祚無疆詞有序

欽惟

皇帝陛下聖文神武

睿算無遺

親總六師三臨絕塞逆賊噶爾丹殲滅餘黨畏威慕義  
降者麋至西北萬里荒遠之域咸隸我版圖既振  
旅京師告成於

郊

廟社稷名山大川加上

徽稱沛

思天下又飾官方修內治勤求化理務撫綏休養其民  
自諸王暨大小羣臣生儒耆老凡數萬人稽首

闕下固請崇上

尊號

皇帝謙德尊光推而勿有猗歟至矣

功德之崇闕

聲教之廣遠自書契以來推校帝王無與為並誠乃

巍巍蕩蕩隆三美五

聖祚億萬年無疆之慶也

臣

叨佐銓衡兼官翰院恭撰

五言詩十二章以

獻冀得附於六義之末頌揚萬一焉

睿筴函三略威弧靜八荒

武功成偃草

文德洽垂裳雲日堯天敞時薰舜樂張微臣同虎拜

聖祚永無疆

玉鑾初幸處朔塞有飛雲細草寒逾秀寒泉挹更清陽  
和回雁磧春色繞龍旌果見欃槍掃吹鐃奏凱聲

涓流還巨壑枯枿亦長林再駕勞

當寧三驅誠失禽弛弓軍禮肅挾纘

主恩深雨雪無淹久歡聞杖杜吟

畫組開戎幕綏旌耀武車

六飛三出塞四海一為家玉障今無外黃圖昔有加虞

廷聲教遠祇是限流沙

聖德如天覆無私萬物春呼嵩皆赤子歟塞亦王人地  
接雲霄近

恩霑雨露新殊方成樂國從此息風塵

四荒仍絕域疆索古難施虎旅揚旌日狼胥折筭時圖  
嫌王會狹功誚鬼方卑合檢東封玉

明堂坐受釐

共覩成功易方知慮始難頻年紆

睿算萬里控

宸鑒協策天人應還師衽席安

皇心非遠畧兵力未全殫

遂返西征旆天閑駕玉虬

珣輿雙鳳戟仙仗五雲旂佳氣河山迴榮光草木浮羽  
林無止趣歌舞遍神州

大愷聲容盛

中朝典禮崇殷勤下

明詔肸蠁荅高穹偃武占文露  
疏勲趣景風何當窺寸管珥  
筆記

天功

淳化彌三極

清衷凜萬幾激揚先吏治  
隱恤在民依幽鄙漸膏澤  
光天麗景暉猶勤衢室問  
晁食更宵衣

展矣膺

鴻號皇哉與古符  
虛中則圖範謙受接唐虞

紫渙溫相謝丹誠迫未輸無由名

帝德擊壤共康衢

七德光仍覽三登頌屢聞

皇風春浩蕩協氣日絪縕  
莫歷無窮葉萬宮有慶雲  
萬方同壽豈長戴

聖明君

松桂堂全集卷一